

Chroci







1457

F. XVII

17/6

AA

1703

Chirocus

5644

~~B. 17~~

6-

~~III V~~

B54 h

36 H

low 7.8

2573

~~A~~

47963
ANDREAE CHIOCHI

MEDICI, ET PHILOSOPHI
VERONENSIS,

COMMENTARIUS QVAESTIONVM
*Quarundam de febre mali moris, & de
morbis Epidemicis:*

ITEM DISPUTATIO DE SECTIONE
Venæ in obstructione ex humo-
rum Qualitate.

CVM PRIVILEGIIS.



V E N E T I I S.

Apud Io. Baptistam Ciottum Senensem. 1604.

ANDREAE CHIOCHI

MEDICI, ET PHILOSOPHI

VERONENSIS

COMMENTARIUM QUÆSTIONUM

Quæstiones de febre maligna, & de
morbo Epidemico.

ITEM DISPUTATIO DE SECTIONE

Venis in obstructione ex humo-
rum Qualitate.

CVM PRIVILEGIO



VERONENSIS

Ad hunc locum addendum. 1804

3
ILLVSTRISSIMO

MO
ATQVE EXCELL. D.

D. ALEXANDRO PICO

MIRANDVLAE PRINCIPI,


ANDREAS CHIOCCVS MEDICVS,

& Philosophus Veronensis S. P. D.



Quæcunque de febre mali moris, atque eius adimende potioribus presidijs, tum de Epidemicorū morborum ratione nuperrimè sum breuiter Commentus, tuo amplissimo nomini nuncupata in lucem edidi. Perspicuitati iuncta breuitas, & excussa in scribendo Veritas mihi fuit imprimis proposita, cum non ignorarem hæc omnia magnis disputationibus, & prolixis commentarijs a compluribus ad tædium vsque explicata, atque exaggerata. Sed profectò non tam laboraui quid alij sentirent quàm quid ego diutius Eſſem meditatus in communem litteratorum lucem e-

uulgare nec tam ingenij laudem ambitiosè de-
mereri, quàm aliorum studia, & actionem
Medicam breuissimo fructuosarum, & defi-
nitarum quæstionum Compendio adiuuare:
Hylari ergo fronte Princeps magnanimè, qui
iure quodam tuæ familiæ hereditario eruditio-
nem omnem amas, opusculum hoc tuis con-
ceptum, & editum auspicijs foue, & nominis
tui auctoritate à Momorum grege, qui vbique
præsto sunt, & tanquam inertes Fuci aliena
tantum vellicant ad quæ ipsi adspirare, vel non
possunt, vel nolunt pro eximia tua virtute, &
in bonas Artes studio, & benignitate defende.
Vale Veronæ idibus Septembris.



Epidemicis.

CAPVT PRIMVM.

Sapienter à magno Hippocrate memorie proditum videtur Artis medicæ Vries, & *diverſarum* nos magis admirari ex merito, ſi quem ex clandestino morbo ægrum reſtituat, quàm ſi desperatis, quive nullo pacto curari poſſunt ferre molietur. Huiusmodi Clauſteſtini morbi ſunt ferrè Epidemici pernicioſi, quando vt idem Auctor ait multi homines ab vno morbo eodem tempore corripuntur, cauſamque ad id, quod communiffimum eſt, & quo maxime omnes vtuntur, referre oportet, eſt autem hoc Spiritus, & Aer morboſam aliquam exhalationem obtinens. Quocirca mihi ſtatutum eſt de Epidemicorum morborum natura, & cauſis quædam perſtringere ad praxim Medicam accommodata, idque per occaſionem noxiæ Epidemiæ, quæ ſu priori anno Veronâ noſtrâ, & Mirandulam valdè affixit. Prius tñ dubitationes quaſdam Vtiles de febre mali moris mirandulæ diſcuſas attingendas exiſtimaui, cum illæ ferè anſam præbuerint Diſputationi de morbis vulgaribus. Cum primùm. n. mirandulam acceſſi, eodem miſſus ab Illuſtriſſimis Vrbis noſtrę Reſtoribus, vt Sereniſſimæ Reipublicæ nomine de morbis illic vagantibus certiores fierent, nihil prius, aut antiquius habui, quam Medicorum ibi degentium in genia explorare, & congruis interrogationibus morborum vigentium quique vigerent ſpeciem, mores, & curandi adhibitam rationem cognoscere, cæterum illi (quæ maxima fuit eruditorum virorum modeſtia, & candor ingenuus) cum febres mali moris cum prauis ſymptomatis, & potiſſimùm exanthematis (peticulas uocant) peruaſas eſſe reſponſiſſent, Fracaſtoriumque noſtrum mirificis laudibus extuliſſent, quòd præclare hoc febrium genus expreſſiſſet, & quibus præſidijs curari poſſent docuiſſet, ſtatim aliquot dubitationes proponentes, de ijs iudicium noſtrum candide exquirebant, ut vltro, citroque iactatis argumentis, & rationibus veritas tanquam ex
ſilice

silice ignis facilius emicaret, ijs tamen in præsentia omiſſis cum de-
 dita opera breuitati ſtudeam, quid in propoſitis quaſtionibus ve-
 rum, aut probabile, quidvè definitè ſentiendum iudicem, adhibitis
 demonſtrationibus pro uirili me breuiter oſtenſurum proſiteor,
 atque eò potiſſimum, quoniam recentiorū quorundam decreta, nec
 veritati, nec Galeno conſentanea, dum ea accurate diſcuterem, à me
 ſint deprehenſa. Inprimis dubitatum eſt an in malignis febris
 xanthematum, vel papularū eruptio critica eſſe poſſet nec ne, & num
 iuuari à Medico debere cum diminutiue ſeſe natura exoneraret. Re-
 ſpondi critica aliquando eſſe poſſe, cum coctionis ſigna præceſſerint
 & in die critica cum uirium leuamento eruperint, vt plurimum uerò
 eſſe motum ſymptomaticum, vel medium potius inter utilem, &
 noxium naturæ motum, cum hæc irritata à copia pernicioſæ mate-
 riæ eam ſtrenuè quamuis præpropere ad cutem extrudit, ut poſtmo-
 dum uires interdum valde reſci uideantur, oportere tamen aliquam
 adeſſe coctionem materiæ, quæ potiſſimum in lotio ſeſe prodat, nam
 primo Epidemiorum ſecundo ſcripſiſſe Magnum Hippocratem
 coctiones celeritatem criſis, & ſalutis ſecuritatem portendere, cruda
 autem, & inconcocta, atque in malos abſceſſus conuerſa ſignificare,
 aut *diſpiſſav*, aut dolorem, aut diuturnitatem, aut recidivas, aut inte-
 ritum, & Galenum in Commentariis memoriam mandaſſe aureum
 præceptum non adeo à medicis vulgaribus obſeruatum, Qui proce-
 dunt morbi à coctionis difficultate, & copia crudorum humorum,
 nullum ab excretionibus conſequuntur emolumentum, & quarto
 Aphoriſmorum, 22. quamdiu à cauſis morbum facientibus natura
 grauatur, & humorum adeſt cruditas, tunc ut aliquid rectè euacuo-
 tur fieri omnino non poteſt, ſiquidem vt bona criſis fiat coctionem
 præceſſiſſe oportet, & ſeparationem ſecutam fuiſſe, tandemque e-
 uacuationē, libro etiam tertio de Criſibus ſeſto, & octauo optimam
 criſim fieri non niſi in ſtatu, & morbo iam cocto reliquas criſes tanto
 eſſe deteriores, quāto ſtatum anticipauerint, quocirca & papularum
 eruptio tanto deterior erit exiſtimanda, quāto longius à ſtatu febris
 ſuperuenerit; ſubieci tamen me exiſtimare motus quorundam irregula-
 res interdum moliri naturam, vt cum à nimia prauū humoris copia ag-
 grauatur, & propemodum opprimitur, ut nulla uel exigua futura
 coctionis ſpes ſubſiſt tunc enim etiam ſine præuia coctione ſeſe exo-
 nerare nititur, quos ſanè motus irregulari pariter curatione cogitur
 ſæpe imitari medicus. Præclarum huiusce rei exemplum habemus
 in Metone primo Epidemiorum 3. ægroto. 7. qui cum peſſimè labo-
 raret, & ex dextra nare ſanguis fluere cepiſſet, ſed imminute, ei ca-
 put lauit Hippocrates, ut ſanguis vberius prodiret, hoc Galenus pro-
 bat magna cum ratione factum, citatque peruulgatum Aphoriſma,
 Quæ educere oportet quoquo maximè vergunt ducere, idque per
 congruentes locos; verum hic ſanguis criticè non eſſluebat, cum an-

re coctionem morbi initio cepisset fluere, nihilominus Hippocrates hunc imminutum motum adiuuat vt patet, quod etiam à doctissimo Trincauellio obseruatum esse memoriae teneo, quem perperam à recentioribus seueris Galenicis vellicari existimo, cum docent fluxionem illam sanguinis in Metone esse naturæ initijs morborum opportunam, nam si eo tempore aiunt, non licet naturæ sanguinē profundere, vtique neq; Medico hoc imitari opus fas esset, quæ certe reprehensio est tantis uiris indigna, cur enim non sit motus naturæ illa fluxio humores morbum efficientes protrudentis? cum potissimum Galenus aphorismum illum citet, qui humores huiusmodi per conferentes regiones euacuare. præcipit? omnino ergò fatendum est illa fluxione euacuatum esse humorem crudum adhuc, & qui morbum committebat non simpliciter sanguinem, aut à reliquis humoribus seuiugatum, cuiusmodi sanè euacuationes sæpenumero in artis operibus nobis licuit obseruare.

CAPVT SECVNDVM.

CAeterum quoniam apud multos medicos, eosque magni nominis peruulgatum est in maligna ac pestilenti febre humores cordis putrescere quo ueluti characterismo hanc febrem ab aliis distinguendam iudicant, hoc etiam in controuersiam est reuocatum; Respondi ego superstitiosam satis uideri mihi illorum sententiam, qui cor solum primaria affectione corripitur in huiusmodi febre arbitrantur, quod his argumentis persuasum habeo. Primo excellens, & maligna putredo satis est vt febris pestilens existat, nihil enim interest cor ne, an iecur, uel cerebrum, uel pulmo afficiatur, illiusque insignis putredinis sit domicilium, & focus, quinimmo præter putredinem illam febres exitiosas, & malignas sæpenumero ex phlegmone illarum partium ortum ducere, quod Galeni disciplinæ est consentaneum, vt iam definiant solam putredinem insignem in vasis magnis comminisci quicunque nulla habita inflammationis ratione solâ putredinem perniciosæ febris causam uidentur obtrudere. Sed præterea si semper cor primo afficeretur in maligna febre, sequeretur necessariò materiae noxiæ decubitus semper fore ad axillas, quæ glandulæ sunt expurgando cordi dicatæ, iam uero, & Parotides cernuntur in hisce febribus, & inguinum tumores, quod argumentum est, & cerebrum, & iecur affici. libro etiam 3. Epidemiorum 3. Com. 11. febrium ardentium, & malignarum causam in iecoris, vètris, & cerebri affectionem refert, com. etiam 12. pulchrè docet Galenus ab eodem cæli statu prauum genitum humorem non easdem partes aggredi: primo etiam Epidemiorum secundo 73. circa æquinoctium vsque ad Vergilias consecutas esse ardentes febres, & sub hyemem tradit magnus Hippocrates, at in Com. Galenus ardentes febres fieri docet flaua bile effervescente

sciente in venis iecoris, ventris, & pulmonum. Accedit Galenum inficias febres ex hypochondrijs simpliciter esse malignas, cum potius iure merito statuendum sit febres à cerebro, membranis, pulmone, & præ ijs a corde affecto verè esse dicique malignas: quocirca eos omnino decipi, & Galeno aduersari, qui malignarum febrium characterissimum in cordis primaria affectione, vel eius humorum putredine constituunt, hinc etiam malè Auicennam à Fernelio damnari quasi in omni febre in corde primo accendi calorem voluerit, cum longe aliud sit non posse gigni febrem nisi cor calida intemperie laboret, aliud cor in omni febre primaria calidi affectione laborare.

CAPVT TERTIVM.

Iam vero, & de sectione venæ non levis agitata est controuersia, probabant quidam solas cucurbitulas scarificatas, idque etià initio febris continuæ, quæ in malignam vergeret, alij sectionem venæ quo uis febris tempore dummodo constarent uires, nec papulæ actum erumperent; dum meum iudicium hac in re interponerem dixi me ualde dubium, & ancipitem in hac controuersia esse, nam, & rationes, & experimenta plurima conuincunt, phlebotomiam non usque ad eò in omnibus hisce febribus esse securum præsidium, ratio demonstratiua est, quoniam ab ingruente malignitate uires apprimè conuelli, & prosterni solent, ita ut qui heri pulsus satis ualidum præferbat, hodie imbecillum, & languidum prorsus ostendat, quod argumento est insignem, & venenatam putredinem in sanguinem, & materiam corporis alimentariam grassari, uel confirmatà iam esse in parte principe phlegmonem, & proinde uitalem facultatem per consensum ualde perpeti, quocirca obseruatum est multos secta uena etiam ante quartam febris diem, nihilominus nihil leuatos, sed potius perijsse: accedit sectionem venæ ab ambitu corporis ad intimas partes trahere quod quarto libro de tuenda. 10. Galeno consentit, cumq; febres istæ ex adstrictione meatuum cutis potissimum hoc tempore eueniant ob Borealem, & gelidam aeris constitutionem, nulli dubium est potius laxandum corporis habitum, & humorum motum, impetūque ad interiora, retrahendum esse ad cutem, eiusque poros esse aperiendos, quos sanè scopos nobis mirificè explent cucurbitulæ, quæ si primo quoque tempore affigantur, auerti potest quam celerissime motus humorum ad interiora, prohiberi que inflammatio, & obstructio, quod profectò emolumentum consequi non possumus si iam progressa febre usurpentur, cū iam partis principis inflammatio, vel excellens outredo ex obstructione est facta, hoc etiam Galeno uidetur probatum, qui libro de bonitate, & malitia succorum in febribus pestilentibus abstinuisse medicos à secanda uena docuit, idque prudenter factum ob uirium imbecillitatem tradit. Scio quidem nonnul-

los è recentioribus respondere nullas esse huiusmodi rationes, nam
 misso sanguine multos sæpe sudasse, quoniam exonerata natura faci-
 lius euacuationem ad cutem molitur, præterea 6. Epidemiorum 2.
 Com. 30. ubi sermo habetur de Simone illo latus pustulas hyeme nõ
 admodum pruriginosas habente, Galenus in huiusmodi affectu pur-
 gationem oppido quam probat. Verum ut controuersia hæc maxi-
 mi ponderis in praxi medica aptè, & congruenter dirimatur, censui
 semper distinguendas esse hominum temperaturas & dies febris, per-
 sitandamque morbi uagantis perniciem, impetumque, & num quid
 diuinum, & abditum subsit ex Galeni interpretatione quod respuat
 phlebotomiam an admittat, quod non temerè monuit Hippocrates
 esse pensitandum, nec solam rationem virium, ætatis, aut affectus ha-
 bendam esse putabam; ut sit in cæteris morbis, qui à perniciosa aeris
 constitutione non proueniunt, nam alioqui, qui plethorici nõ sunt,
 verum humoribus à sanguine recedentibus exuberant calidioribus,
 uel frigidioribus à sectione uenæ arcendos esse iudico, de Galeni po-
 tissimum, & Auicennæ sententia, quorum alter cum vel ultra sangui-
 nem progressi sunt humores, uel citrà resisterint à phlebotomia absti-
 net quarto de tuëda, alter uero in signi præcepto, & oraculo nos mo-
 nuit, ut caueamus ad alterutrum ægros perducere, uel feruorem bi-
 liosorum humorum, uel cruditatem frigidorum, quare ne dissipen-
 tur spiritus, qui uirium sedes, & substantia existunt, frænumque ijs
 humoribus adimatur omiſsa sectione uenæ, cucurbitula dumtaxat
 abhibenda, quæ trahere à profundis ad cutem aperire, & perspiratio-
 nē humoribus indere sine uirium iactura possint, idque potissimum
 in febris malignis, quæ à prædicta aeris constitutione sunt grassa-
 tæ, & vulgatæ, in quibus cutis meatus laxandi, & humorum motus
 ad cutem trahendus erat, sed nec in plethoricis etiam transacta quat-
 ta hauriendus è uena sanguis, quoniam iam malignitas inualeſcit, &
 uirium etiam futurarum habenda ratio, hinc complures Medici hoc
 anno sunt animo consternati cum, uel paulo ante quartam secta ue-
 na plethoricorum, & ætate florentium, nihilominus multi ex ijs an-
 te septimam, & post obierint, ut non iniuria statim oborta sit contro-
 uersia, quod alii uenæ sectionem probabant, alii damnabant, cum
 multi promiscuè interirent, quibus huiusmodi præſidium erat, uel
 tempestiuè adhibitum: Sed uelim accuratè legi, quæ à Fracastorio Cr-
 ue nostro, & Medico Clarissimo libro tertio, de curatione contagio-
 rum morborum cap. 6. scripta sunt, qui præclare sententiam hanc no-
 stram tuetur, & demonstrationibus adhibitis confirmat, initio enim
 dumtaxat huiusmodi febrium cum plenitudo magna subest, & co-
 pia sanguinis fibrosi cum uirium robore secandam uenam iudicat, il-
 lud etiam acutè, & prudenter monet obseruandum esse, an semina-
 ria putredinis, & infectionis extrinsecus ab aere obuenerint, tunc e-
 nim cautiùs, & maturiùs de aperienda uena consultandum, ne conta-

giosus humor per summa corporis vicens introrsum facta phlebomia statim in cordis sedem trahatur, uel iam dispersis seminariis, quæ radices vndique egerint secta vena sanguis magis agitur, & commiscatur, nihilque humoris noxii, & putrefacti euocetur. Quapropter in statu huiusmodi aeris præter naturam diligenter Medicis obseruandus est impetus morborum vulgarium, & quo pacto affecto corpore isti vulgentur, siue enim ex aere inuehantur in corpora putredinis seminaria, vel adstricto vniuerso ambitu cutis humoris impetum ad interiora ceperint, an cucurbitulæ phlebotomiæ præferendæ sint: ex memoratis distinctionibus intelligendum, quarum ope profiteor vel nullum, uel rarissimos periclitaturos ex usu præpostero horum præsidiorum cum nemo nesciat distinctiones medicum rationalem decere, & in omnibus artibus, quæ empirice non tractantur maximum emolumentum afferre; Non me fugit hoc saluberrimum Fracastorii præceptum non usque adeo à Medicis obseruari, qui cū Epidemici morbi, & febres grassantur, multosque interire conspiciunt ualdè trepident, & quid consilii capiant, sæpè numerò ignorant, quare ut ex methodi legibus artem saltem exercere uideantur non recedunt à consueta medendi formula, sed scopis quibusdam secandæ uenæ præsentibus statim sanguinem detrahendum sanciunt, haud ritè prius perpena morbi conditione, & pernicie, ab aere contracta, quæ huiusmodi præsidium fortè respuit.

CAPVT QVARTVM.

Quæsitum deinceps curi se, atque sollicitè an Theriacæ usus in his febribus conueniret, nonnullos enim adeo huic Antidoto fuisse addictos scimus, ut ne dum solam per se exhiberent, sed etiam cum medicamentis soluentibus, & contemperantibus permiscerent. Respondi hos è diametro aduersari Galeno libro de Theriaca ad Pisonem cap. 14. cum usu Theriacæ fisti medicamentorum operationem docet; cæterum non me latere recentiores Galenicos valdè inuehi contra huius præclarissimæ Antidoti usum in istiusmodi febribus, dum contendunt crudos humores ab ea agitari, ad peniores partes deduci, obstructions, putredinem augeri, & uniuersam humorum coctionem impediri, præterea si Galenus tantus Medicinæ auctor primo ad Glauconem in febre quartana, quæ à frigido humore ortum ducit ante coctionem theriaca non utitur, quanto magis in feruidis hisce febribus ab humore calido eius usum damnabit: verum me his rationibus non omnino permoueri, aut deterri quominus eas antidotos sæli iter aliquando usurpem; cum enim symptomata grauiæ, quæ subsequuntur vigilæ, dolores capitis, cardialogiæ, angines, nec non uenenata humorum putrescentium qualitas, ad sese curationem trahant, nulli dubium est nullum theriaca præsidium his adi-
mendis,

Et de morbis Epidemicis.

II

amendis, & mitigandis esse accommodatius. Accedit cordis vires valde laborare ob confluxum putrescentis, & malignæ materiæ, quam tum calore insigni ad se pertrahit cor præternaturam constitutum, partim ipsa proprio impetu tanquam uenenata, & ad cordis temperiem, & spiritus antipathiam obtinens ad ipsum confluit, non ergo ad legitimam febrium harum curationem desiccando scilicet superfluas humiditates, aut aperiendo necessaria est theriaca, ut nonnulli affirmare non uerentur, sed dumtaxat ob grauiasymptomata, quæ vires naturales, & vitales prosterunt, temperiem partium, & calorem insitum labefactant, & exhauriunt sine quibus legitima institui curatio nequit, quod accuratè obseruandum Medicis omnibus sum professus.

CAPVT QVINTVM.

IAm uerò de bolo atmena, terra Lemnia, lapide Bezaartico, Margaritis præparatis, cornu cerui vsto, hiacyntho, atque aliis huiusmodi a medico quodam Hæbreo, qui Mirandulæ medicinam faciendam consenuerat acris admodum nobis præsentibus cum Iosepho Thedisco Mirandulano Medico ornatissimo instituta est altercatio, cui, & alter medicus Mutinensis, vir certè apprimè doctus interuenit, cõtendebat Hæbreus eorum remediorum usum esse noxium ob duas non inelegantes rationes, primum illa omnia adstringunt, cum lapides sint, quorum ortus ex terrea materia Aristoteli, & Philosophis statuitur, at huiusmodi febres ex obstructionibus insignibus, & multiplicibus fiunt, quarum curandarum scopus est apertio ualorum, & attenuatio humorum: alia ratio erat quoniam putabat hic medicus affectum pulmonum, & partium spiritualium cum his febribus illic tunc populariter uagantibus connecti, ab aere enim humidiori, & pluuio repleta esse capita tum uigente boreali aeris constitutione expressas esse complures humiditates in pulmones, quæ ibi putrescentes pulmoniam aut saltem insignem illarum partium æstum inuenerint, quod ex difficili anhelitu, siti, & maxillarum rubore colligebat, quibus sanè affectionibus, pulueres illi adstringentes uoxii uidebantur, cum potius eclegmatis lenientibus, & humectantibus, expulsioremque adiuuantibus opus esset ad materiam illam e pulmonibus educendam. Cæterum non esse omnino reiiciendum illorum pulmonum usum, cum eruditis illis medicis cõte debam quamuis necita magnificandum, ut nonnulli ferè Empirici solent, qui sola experientia inuentis medicamentis has febres malignas, & pestilentes curandas iudicant, Galeni etenim de Bolo armena sententiam, atque Arabum, & recentiorum Medicorum consensum de huiusmodi antidotis non esse temerè damnandum, refrigerant enim huiusmodi medicameata, & desiccant, sanguinem puriorem, & defæcatiorem reddunt

& calorem igneum, naturalemque attemperat; sed & Fracastorius non
 ster libro tertio, cap. 6. de curatione febrium pestilentium usum ha-
 rum antidotorum probauit, dummodò facile in pollinem terantur,
 & cum liquidis coalescant, habere enim antipathiam tum spiritalem,
 tum materialem ad contagiones, præterea humoribus intermixtos
 putrefactionem glutinis instar prohibere, ob insignem verò subtili-
 tatem, & tenuitatem, ad quam redacti sunt, nec obstructions facere,
 nec ullam naturalem expulsiōem prohibere, eiusmodi esse phragi-
 dem leuiam, Bolum armeniam, margaritas, corallia Hyacinthum,
 Saphirum, Tormentillam, Bistortam, cornu Cerui, monocerotis, scor-
 dium. Quocirca hæc etiam esse opportuna peractis communibus
 euacuationibus ob symptomata graua, quæ superueniunt, & præse-
 tim cum vi malignorum succorum natiuus calor, & cordis facultas
 opprimi, & ualde prosternti uideantur. Iam uero, & Alorum complu-
 ra uim aliquā habent detergentem, & aperientem ut Bolum armena,
 Tormentilla Pentaphylon, scordium, atque alia huiusmodi, quæ pro-
 inde in partium spiritualium affectibus non uiderentur improbanda
 sed de his hæc tenentur.

CAPVT SEXTVM.

NEc illa sanè quæstio prætermissa est an non expectatis coctionis
 signis quamprimum purgantibus medicamentis in pestilenti,
 & mali moris febre utendum sit; Ad hanc dixi me aliàs in quæstioni-
 bus meis ab hac nouennium impressis fusè probasse purgationem
 reuellentem initio harum febrium non expectatis coctionis signis,
 quod & Trincauellio, Montano nostro, Vallesio, atque aliis optimis
 medicis probatum uideo, idque contra recentiores quosdam, qui nu-
 perimè scripserunt, & Galeni sententiam hac in re præse nimis, &
 seuerè interpretantur, quare me in præsentia breuissimè rem conclu-
 surum; Rationes pro nostra sententia demonstrantes sunt istæ, Vbi-
 cūque humores turgent, uel periculum est ne turgent aggredien-
 dum statim ad purgationem, ac in huiusmodi febribus, uel turgent,
 uel paulò post turgenturi sunt, & quod deterius, periculum est nè a-
 ctu repant ad partem principem, & uires uitales cordis potissimum
 nè dissoluant, uel suffocent, ergò ex templo, & initio expurgandum.
 Accedit, humores ut plurimum ex maligna putredine venenatos
 effici, qui per coctionem ad nullam bonam frugem redigi possunt cu-
 iusmodi humores reperiri Galenus concedit, censetque in legitima
 coctione humorum substantiam manere, solum calore externum or-
 natum iis conciliari, ut ad purgationem idonei reddantur. Clamant
 recentiores absurdam, & perniciosam hanc sententiam existere, quo-
 niam non ualeat sequella febris est pestilens, ergò humores turgent,
 quoniam etiam non turgere possunt. præterea medicamentorum na-

tura ex secundo de ratione victus in acutis 12. corporum quæ expurgantur naturis est aduersaria, & quoquomodo læthalis, & pestilens; Falsum præterea esse docent uenenatos humores nullam posse coctionem recipere, quod ita probatum uolunt; multi ex his febribus pestilentibus euadunt, ergo necessario per coctionem humorum uindicantur. summptionem probant ex Galeno 3. de præsagiis ex-pulsi-bus 3. ubi monemur eos euadere, quorum calor putridus magis ad humores uentriculorum cordis deflectit, quam ad corpus ipsius uisceris; sequellam ita ostendunt Galenus libro de constitutione artis capitulo 18. nullum morbum sine coctionis inditiis dissolui posse tradit, & quarto Aphorismorum 21. docet in morbo pestilenti nigras deiectiones in declinatione redditæ utiliter. Verum enim uero iure iurando affirmari hos dedita opera nodum in scyropo quæsisse, cū in febre pestilente, & maligna raro humores turgere contendunt; quid est enim esse pestilens, uel mali moris ~~namque~~, nisi vires prosterne præ ingenti succorum prauitate, ut quomodo per Deum fidem hæc vires prosterne, nisi actu repant humores prauis ad ipsum Cor, uel pulmonem, uel Cerebrum, ibique, uel perniciosam inflammationem, uel putredinem afferunt, quod si inordinato motu moueri, nec adhuc certam partem occupare, quod est turgere ex Galeni decretis, expurgationem postulat, at in confesso est; quū iam ex symptomaticis grauibz superuenientibus colligimus actu humores noxios confluere ad partes principes, non statim reuellendi gratia expurgante medicamento itemur? Solebat Hieronymus Capuaccus olim Doctor meus dicere, id insicis ire, uel obliuata dementiæ, uel crassissimæ ignorantie esse argumentum: At quo pacto, si Viri docti, cognoscimus febrem esse pestilentem, & malignam? Dicetis si Galeno assentiri uelitis ex symptomaticis superuenientibus id perno-sci, cum enim superuenerit delirium, uel cardialgia, & magnus Thoracis, & Præcordiorum æstus, & ueluti angustia, cum pulsus imbecillitate: asseritis naturam ad caput repere, ad pulmones, & Cor; Tum febrem pestilentem esse pronuntiatis, & materiam turgere negabitis? immo perniciosus moueri, quam si turgeat? cum iam actu in partes principes præsentaneo periculo confluat: Ergo uelitis nolitis tandem fateri debetis in omni febre pestilenti, & mali moris, quatenus talis est, perniciosus nimirum symptomaticis associata, materiam turgere, & proinde expurgantibus medicamentis, sed blandioribus esse euestigio utendum. Præterea in humoribus putrescentibus accensa febre indicatio se offert euacuandi, & alterandi. alteratio putredinem finit manente adhuc substantia humoris de Galeni sententia in Arte Medica cap. 89. at humores reperiuntur interdum in corpore adeo corrupti, ut nullo pacto per coctionem ad bonam frugem redire valeant, quod Galenus sapissimè docuit libro artis Medicæ cap. 29. libro de locis affect. cap. 5. & alibi; Qua de re copiosè scri-

tis egi libro tertio, nostrarum quæstionum quæst. 13. ut propterea in præsentia non sit longior oratio suscipienda. Id tantum colligi, & intelligi nolim humores praua corruptione putrefactos non posse coctione corrigi, sed statim esse corpore educendos, & apta reuulsione à partibus nobilibus auertendos, quod purgantibus medicamentis commodè assequimur, cum primum graui illa symptomata se prædunt, & antequam grauior virium lapsus sequatur. Sic igitur materia coniuncta euacuata causæ postmodum antecedentis coctionem mollemur, quæ est materia non usque adeo corrupta, sed mitiori putrefactionis calore correpta; istiusmodi autem putrefactio finiri alteratione sanè poterit manente humorum substantia; Medicus uero meatus corporis aperiendo, & crassos humores attenuando insignem operam naturæ coquenti præstabit; Huiusmodi enim præparatio propria est Medici, sicuti concoctio naturæ, ut passim Galenus monuit. Quocirca libenter concedemus nos morbos, & febres, quæ non sunt mali moris, aut pestilentes, & præterea quæ etiam tales existunt, sed ratione causæ antecedentis, non posse commodè finiri, nisi per coctionem, ut Galenus libro de constitutione artis dicebat, quamquam exempla quædam rara ostendunt absque coctionis signis multos etiam uindicare, ut Metonis exemplum primo Epidemicorum, & præter cætera, quæ obseruauimus, Iulii Cæsaris Bonelmi affinis mei, quem super curauimus, qui ex plenitudine, & maligna febre in quinta die multis prægressis coctionis signis per copiosum fluxum sanguinis à naribus est vindicatus: sed de his satis. Responsiones ad cæteras rationes ex dictis satis superque patent.

CAPVT SEPTIMUM.

Verum enim uero quoniam præclare ab Hippocrate traditum nunc detur libro de aere, aquis, & locis medico anni tempora perspecta esse debere siue propriam naturam seruauerint, siue ad aliam transmutata fuerint, quid uero horum unumquodque efficere valeant tum uentorum communium rationem, & cuique regioni priuatorum, aquarum etiam uires ei cognitas esse oportere, cumque urbem aliquam sibi ignotam adierit situm eius explorandum, quomodo ad uentos, & cæli plagas iaceat, aquas etiam an tennes, & molles sint, an duræ, uel asperæ, terram etiam an tenuis, & aquarum experts, an contra potius crassa, & humecta, an in concauo, & æstuoso loco, uel sublimi, & frigido sit posita, hominum etiam uiuendi ratione peruestiganda num cibo, potuque se expleant, & ocio se dedant, an laboriosi sint, & cibum appetant pariori victu contenti. Cum hæc nobis inquam obseruanda Hippocrates præcipiat, de his etiam eos præclaros medicos diligenter interrogauimus, & præsertim Ioannem Frambertum Illustrissimi principis Medicum eruditissimum, & humanissimum quem

quem honoris causâ nominatum uelim. Comperi autem Cælum Mirandulæ crassius esse, & humidius, aquas stagnantes, & ferè palustres, terram crassiorem, & humentiorem in concauo, & æstuoso loco sitam, autumno superiori constitutionem aeris Australem præcessisse, tum hyberno tempore subsequutam Borealem sicciorem, & frigidior, quàm par esset, hinc calorem insitum corporum imbecillum redditum, corporum ex pleniori cibo repletorum meatus externos densatos, atque adstrictos, vnde putredo insignis ex recursum humorum, & prohibito illorum effluxu superuenerit, quæ simul malignas has febres, & exitiosas procreauerit. Existimabam tamen uberiorem soli humorem posse absumi, si aliò perductus quosdam auocaretur, & simul salubriores ad usum aquas futuras, si ante omnia ad ignem admotæ excoquerentur, uel caelestes, & pluriæ cisternis exciperentur. Cæterum inter differendum mentio incidit celebris Hippocratis aphorismi. 3. lib. Aphorism. 1. mutationes temporum maximè pariunt morbos, & ita in ipsis temporibus magnæ mutationes frigoris, aut æstus, & alia secundum rationem, quem sanè aphorismum præclarissimum dixi haud satis aptè mihi expositum à Galeno videri, qui mutationes præter naturam temporum anni intelligendas censuit, non eorum naturales successiones, & vicissitudines. persuasus ea voce *calida*, non enim mutatio temporum naturalis maximè gignit morbos licet eos gignere possit cum, & eorum multos facile abigat, & dissoluat, quare sensum aphorismi vult esse temporum inequalitatē, & mutationes casu factas morbos inuehere. Verum si expositionem Galeni accipiamus superuacanea uidebitur reliquæ aphorismi pars in ea enim idemmet frustra repeteretur, quid enim sibi volunt magnæ mutationis frigoris, & caloris in ipsis temporibus, quam inequalitatem illam à Galeno expositam? Accedit ratio acutissima doctissimi Vallesii, quoniam si benè mutationes temporum præter naturam expendamus, illa uox, maximè, non uidebatur adicienda, quoniam illæ, & soluere quosdam morbos, & alios inferre, uel augere ualent, si enim aer frigidior, & humidior fiat quam par sit, talis uè diutius perseueret, lethargicis affectionibus correptos malè afficiet, phreneticos plurimum iuuabit; Hippocratis ergo mens eò vergit, ut temporis mutatione hoc est aeris noua conditio inuecta inter morborum causas maximè sit reponenda, afficit enim, atque alterat corpora nostra aer, nō solum ipsa ambiens, atque eorum meatus, uel laxans, uel adstringēs, uel perspiratum humorum moliens, uel eorumdem compulsionem, & retrocessum ad interiores partes, verum etiam respiratione, & articularum pulsatione admissus, & receptus. Sed profectò mutationes aeris in ipsis met tempestatibus hoc efficacius præstant cum præter naturam fiant, nec tempestiue tempestiua reddantur, hinc enim morbi inconstantes, & iudicatu difficiles de Hippocratis sententia oriuntur, cum anni tempora suam temperaturam, & naturam non tucantur,

in ipsis ergo temporibus mutationes caloris, & frigoris, humoris, & siccitatis flatuum, & tranquillitatis, Medicis potissimum obseruande; ut si diutius durauerint, & sequens anni tempus exceperint, uel in hoc ad contrariam constitutionem permutantur, fiant ex magni Hippocratis prescripto futuros, uel ingruentes morbos prenoscere, & predicere, quin etiam congrua preseruatione iniuncta anteuertere, quod & medicorum dignitati, & uniuersae Reipublicae utilitati plurimum inferuiret.

CAPVT OCTAVVM.

CAeterum quoniam rumor increbuerat Mirandulam pestilentia esse conflictatam, hanc sententiam falsam fuisse ita, & demonstratione, & euidenti experimento conuinci posse sum professus. cum enim ex Hippocrate, & Galeno in Epidemicis, morbi sint, uel dispersi *σπορὰς μοι*, uel communes, & utrique, uel unam, uel plures regiones uexent. dispersi diuersorum generum communes eiusdem generis habentur, & utrique adhuc obseruantur esse, uel lethales, uel salubres, morbi communes, & lethales (hoc est qui tres conditiones obtineant, ut sint eiusdem generis, & naturae; maiorem hominum partem interficiant, & sint contagiosi) pestilentes sunt, & pestem ipsam aduehunt: at morbi communes eiusdem generis reliqui duabus conditionibus carentes Epidemici sunt simpliciter, & passim uagantes. morbi igitur mirandulae peruagati cum iis conditionibus caruerint, uel leuissimam saltem suspicionem contagii attulerint pestilentes: uel uera pestis non sunt existimandi, nec enim praeterea maiorem hominum partem interemerunt, nec uniuersas familias extinxerunt quod uera pestis solet efficere quam uel Deus optimus maximus ab omnium ceruicibus auertat, quae de re nos etiam Mirandulae certiores facti sumus cum sedulo admodum Ideam, & causas morborum, qui erant illic grassati, superiori hyeme ego, & collega meus peruestigaremus, à nobis certe uigesima tertia Die Februarii, quae illic eramus obseruati sunt morbi potius dispersi, iisque non usque adeo perniciosi, aut lethales hoc est pleurithides, febres malignae declinantes, febres tertianae, atque alii huiusmodi morbi, quorum qui erant exitio si ante undecimam non interimebant; iam enim epidemice illius furor deferbuerat, cuius certe grassantis tempore praecipue enituit optimi illius, & magnanimi principis in suos caritas, & insignis liberalitas tum Medicorum illius ciuitatis prudentia, & diligentia in curandis aegris, quod hoc loco libenter memoriae proditum uelim, non quod eos meo testimonio egere existimem, sed ut ceteris in posterum exemplo sint, & ueri officii Medici, atque omnium christianorum, & ciuiliu uirtutum, nam tanti principis eximia uirtus, & pietas suorum animis subditorum consignata, & passim ab omnibus celebrata meo

preco.

præconio, aut testimonio nulla ex parte indiget. Pestis autem, vtdo-
cet Galenus, non est vnum certum morbi genus, sed quivis morbus
potest esse pestis, dummodo eodem genere morbi plures laborent, &
extinguantur, quare hinc etiam colligimus communem pestis cau-
sam externam, esse aerem, vt rectè ab Hippocrate est constitutum 2.
de natura humana. Huic causæ malam victus rationem adiungit Ga-
lenus libro de cibis: boni, & mali succi, & primo de differentiis fe-
brium, eadem demonstratione vsus, quam Hippocrates in aeris vi-
tio statuendo adhibuit: nam sicut aer communis est plurimis, ita &
victus ratio, quod etiam satis cõprobat exemplum epidemiæ in Aeno-
cum propter esum leguminum ingenuum dolores, & imbecillitates
regio incurrit, respondent viri eruditi, aerem vnâ cum alijs causis hoc
est cum praua victus ratione, & vaporibus elatis à putridis aquis, &
speluncis pestem gignere: vel dicendum elatâ ab aere fieri morbos
Epidemicos: à victu, & vaporibus endemicos, qui certam regionem
inuadunt; Hæ responsiones nullo pacto Hippocratis sententiam aut
Galenî tuentur, vel eas conciliant, cum ille solum aerem vnicam
causam pestis statuat, Galenus prauum etiam victum adiungat, à quo
morbos epidemicos, & communes non solum endemicos procreari
velit, quocirca diligentius in hoc argumento & difficultate explican-
da versandum esse videtur cum aliorû inuenta mihi non probentur,

CAPVT NONVM.

C Vm de propofita difficultate diutiffimè cogitaffem, atque acri
meditatione, & iudicio omnia expendiffem, tandem comperi
Hippocratem 2. libro de natura humana aerem vulgarium, & com-
munium, victum vero disperforum morborum statuisse auctorem,
quare duo isthæc sunt extrema aer, & victus ratio, quæ si communis
fit mediam morborum naturam inter communes, & sporadicos, eos-
que potius epidemicos non pestilentes efficiet; vt igitur morbus fit
communis & pestilens veluti Epidemia soli aeri acceptum refertur
quod acutè, & solidè pronunciat magnus Hippocrates, at varias mor-
borum Ideas corporis dispositio & victus faciunt; Hinc intelligimus
vulgares, & Epidemicos morbos sine peste varias species, & formas
posse obtinere: quemadmodum & sporadici sese habent, at pestilentes
eiusdem generis esse debere, quoniam nihil est quod variare ideam
possit, & omnis pestilentia morbi communis nomine ab Hipp. signifi-
cata ab aere ortum ducit, quemadmodû, & multi epidemici absque pe-
ste ab eodem aere valde intemperato oriri possunt, vt aeris constitu-
tiones Epidemicæ ab Hippocrate cõscriptæ satis testantur, verum id
diligenter obseruandum à pestilenti constitutione corporum affectio-
nem, & diathesim facile opprimi, & vinci vt sibi omnia seruire cogat
cum magnam agendi vim, & efficaciam habeant, vt sicuti ignis om-

nia facile vincit, & in suam formam transire cogit (vt propterea cætera ipsi materiam esse Aristoteles docuerit ita pestilens venenum omnia inficiens suam vim, & noxiam malignitatem omnibus æquè impartiat calidis frigidis, plenioribus, siccioribus, & cacochymis tēperaturis execeptis fortè nonnullis corporum constitutionibus, quæ vitali robore, & spirituum, humorumq; puritate satis posset. Aer igitur princeps est causa morborum vulgariū: victus, vt idē morborum varietur efficit, sicuti hoc anno Veronæ patriæ meę ex aere sicciorē, & frigidiore quam par sit, quivē talis diutissimē perseueravit, Anginæ, pleurithides, pulmonia, destillationes συντόμος ἀπολλύντες, vt ait Hippocrates Febres malignę complures sunt vulgatę prout victus ratio, & corporis varia affectio vel Diathesis huic, aut illi morbo homines reddebat obnoxios, hoc pacto censemus Hippocrati conciliari Galenū posse; ille quippè vnum communem, & pestilentem morbum respexit, cuius aerem solum statuit auctorem; hic quamvis communem, & Epidemicum, etiam non pestilentem, cuius geminam causam attulit aerem, & victus rationem, quæ etiam ad variandas ideas morborum Epidemiæ non pestilentis plurimum confert: Hęc consentanea videntur ijs, quæ in libris Epidemicis, de natura humana, de cibis boni, & mali succi, atque alibi traduntur: Quo quidem pacto exponenda esse arbitror veterum dicta, non nouis dogmatibus exagittanda vt ij faciunt, qui nuperrimē scripserunt: Hi enim calore quodā Phantasiz perciti, vt Ioubertus Argenterius, & Simon Simonius, atque alij nulla iuditiij vi, aut certa notitia, vel memoria. Veterum dogmatum opinionum monstra in medicinam inuehunt. Iudicium est sapientiæ anima, & memoria est eius veluti Fulcrum: illius lumen potissimum elucet, dum vniuersales methodos, & artis Theoremata particularibus, & singularibus aptamus, tum nostram sententiam validis rationibus comprobamus, & si quæ ambigū à Galeno, & Hippocrate dicuntur distinguendo, atque aptè interpretando in lucem reuocamus quod itempestate nostra Franciscum Vallesium egregiè præstitisse non ignoro: Hęc iudiciij officia sine ope memoriæ effici nequeunt quare qui vel legendo, vel scribendo, vel consultando proprio Marte omnia effingunt, sæpè naturalis iudiciij vi decepti non synceram doctrinam, sed suas imaginationes obtrudunt, quæ eò cognoscuntur praxi inutiles, sæpè perniciosæ, quoniā ex vna, vel altera obseruatione accidentaria propositiones vniuersales colliguntur aduersus antiquorum doctrinam, quæ captio est à secundū quid ad simpliciter: de his loquor, quorum scripta ad manus meas peruenerunt: Audiant quæso isti aurea magni Fracastorij verba 3. de morbis Contagiosis cap. 6. ita enim scribit de smaragdo loquens: Ego quidem super hac re experientiam sufficientem fieri satis difficile arbitror, nam & si aliqui assumpto smaragdo ter, & quater visi sunt euasisse, infida tamen est ad vniuersale illatio si fiat, quoniā incertū est per accidens ne contigerit,

tigerit, an per se, nisi ratio ad communem naturam fiat: Verum hæc
τραπεζία, licet non infructuosa.

CAPVT DECIMVM.

Sed antequam de epidemia Veronensi verba faciam, nonnullæ
 adhuc de pestilentia causis dubitationes explicandæ, & scrupi
 eximendi, quæ cui piam posteriorum scripta legenti negotium fa-
 cessere possunt: Diximus Aerē pestilentem pestilentiam afferre: Mul-
 ti hoc loco solēt curiosè quærere, quod aeris vitium pestem efficiat:
 Fernelius vir grauis & diligens 2. de abd. rerum causis occultā qua-
 litatem iactat: Alij seueriores Galenici qualitatem euidentem ex in-
 signi putredine ortam: Vtramque alij agnoscunt: occultam hac ra-
 tione, quoniam si in aere sit qualitas occulta & coelestis, quæ bene-
 fica sit, & genitalis ex Arist. 2. de generatione anim. Ergo ex contra-
 riorum lege occulta uis corruptrix & noxia in eodem à cælo inge-
 nerabitur: aliam afferunt rationē, quoniā Pestis arcanis remedijs cu-
 ratur Bolo armena, Theriaca, Terra lemnia, atque alijs antidotis: ar-
 canum igitur fuit id, quod nocebat: prima ratio nobis sanè inanis vi-
 detur, quibus lamdiu persuasum non absque efficacibus rationum
 momentis in cælo, & syderibus nullam esse vim maleficā, quoniam
 in ijs nulla est contrarietas, nec malefica forma, à qua ea uis, actione
 possit prodire, tantò minus ex planetarum adspectibus, aut Radiorū
 varijs commixtionibus ea prodibit, cum ex philosophiæ decretis
 ex positu & relatione nulla promouet actio, vt etiam à Ioanne Pi-
 co optime est demonstratum. Cæterum & isti auctores vel inuolūtè
 loquuntur, vel sibi repugnant, dum subdunt vitium hoc occultum
 à syderibus, gigni, non quod sua natura sydera quicquam mali fa-
 tiant per se, sed per accidens: hoc astrologorum Auic. & Hipp. aucto-
 ritate confirmant qui quarto de morbis scripsit morbos fieri, cum
 ea, quæ ex cælo eueniunt, inepta sunt; profectò nisi valdè fallor si
 qualitas occulta, benefica, & genitalis est per se & reipsa agens vel
 positiua, vt vocant, cur & hanc maleficam & corruptricem talem ef-
 se non fateamur? si contrariorum par ratio esse debet, præterea de-
 bebant enucleate explicare quomodo sydera per accidens aliquid
 mali faciant, cum & picus doceat per accidens refrigerare lunam dū
 auerso à nobis lumine in nouilunio fileat. Hippocrates verò per ea
 quæ ex cælo eueniunt, syderum ortus, & occasus intelligit, Pleia-
 dum, Arcturi, Orionis canis quibus sanè astris ad solam temporum
 designationem in libris Epidemicis vtitur, quoniam ijs orientibus
 in variis anni temporibus pluuiæ fuerint tempestiuæ, & salutare
 quas signa vocat libro, de Aere aquis, & locis, cum ait, annum fore sa-
 lubrem cum sunt ratione signa in astris orientibus, & occidentibus,
 vt interim Astrologorū nugas vitemus, qui ex his locis falsò osten-

dunt Hippocratem probasse astrologicam disciplinam & iudiciariā
 de influxuum vi rationem : Aliorum porro auctoritates nihil mora-
 mur . Iam vero nulli diffidendum in aerem induci posse hanc arca-
 nam qualitatem ex prauis vaporibus elatis ab aquis putridis, & spe-
 cubus, aut alijs rebus corruptis vt ex cadaueribus insepultis ; hæc
 enim *iniquata* inquinamenta scilicet aerem occulta, & inexplicabili
 ui efficiunt, quod 2. de natura humana tex 5. Galenus pulchrè do-
 cuit. A qualitate autem manifesta calore scilicet, & humore, vel mu-
 tatur aeris substantia, vel simpliciter alteratur, si aer secundum sub-
 stantiā corrumpatur pestilentia oboritur: si simpliciter intemperie af-
 ficiatur sunt morbi Epidemici quod ex Galeni etiam decretis pri-
 mo de temperamentis cap. 4. intelligimus . porro apud Medicos re-
 ceptum intemperiem hanc in aere fieri à variis vaporibus sursum
 eleuatis, nubibus diutissimè perseuerantibus, diuturnis imbribus
 cum subsequente sole maxima halituum copia euocatur, hæc intem-
 peries calida, & humida primum aerem alterat, si vterius proueha-
 tur substantiam aeris inuadit, eamque putrefacit, aerem enim nos
 perpendimus, non vt est elementum simplex, sed vt vaporibus, & ha-
 litibus compluribus cōfusus est, & inquinatus, hinc pestilentiam ne-
 cessario ex contactu, & inspiratu huius modi aeris contingere ope-
 re prærium est; At si quis ambigat de ceteris aeris intemperantijs ca-
 lida, & sicca; frigida, & humida; frigida, & sicca, quæ solent sæpe nu-
 mero obuenire cum alijs viris doctis statuo quidquid secus fortè
 censuit Fernelius ab iis solos epidemicos morbos non pestilentes
 induci, quamquam non possunt illi auctores id absolutè constituere
 cum abdita qualitate, & maleficam cælestem admittant, quæ af-
 ficere aerem minime calidum, & humidum sed ijs tribus intempe-
 riebus affectum facile posset, quin etiam temperatum, & pestilentiā
 ita denuo asferre. Quod spectat ad arcana præsidia eorum vsum &
 nos concedimus, qui inquinamētorum abdita proprietatem cum
 Galeno admittimus quæ ex aqua, & terra euocata aerem pollunt,
 quæ sanè abdita proprietas licet non cælestis ex occulta tamen per-
 mixtione & inexplicabili ortum ducit, cæterum existimaui nihilo-
 minus semper non ita occultæ proprietati fidendum, quin euiden-
 tium qualitatum maior ratio habeatur, nam vt supra etiam obserua-
 uimus cum habeant illæ antidoti refrigerandi sanguinem attempe-
 randi, & puriorem efficiendi, quod & à Fracastorio nostro obserua-
 tum legimus .

CAPVT VNDECIMVM.

Aerem corruptum, & inquinatum pestilentie auctorem esse sta-
 tuimus : verum in vulgus iam increbuit opinio, contagium ex
 fomite ad concipiendam pestem plurimum posse, imò serè in Rebus
 publicis,

publicis, & ciuitatibus quantum uis bene institutis ita receptum est à fomite pestilenti esse cauendum, custodijs publicis ad confinia ditionis, & notas vias adhibitis, interdictis vrbium comercijs, publico sanitatis diplomate ab aduenis seuerè exigendo, Nosocomijs, quæ Lazaretta vocantur exædificandis, comburendis rebus ferè omnibus, quæ ad ægrorum supellestillem pertinent, atque alijs huiusmodi cautionibus anxie admodum, & capitali etiam multa iniunctis, atque ita satisfactum abundè putant publicæ salutis, quasi ab aere nihil formidandum sit, dum à contactu, & fomite securi sumus. Hæc sanè tractatio vberiore disputationem postularet, cum maximi sit momenti, sed quoniam in præsentis de peste ex professo non agimus, nec hic locus est accommodatus huic rei explicandæ cum nec ciuitas nostra, nec Mirandula Dei beneficio pestilentia hæc tempore laborarint: solum, validas quasdam rationes breuiter afferemus ad communem hunc errorum explodendum, cum Syluester Facius Ienuensis Doctus, & diligens Medicus hoc argumentum pulchrè, & copiosè in suis dialogis tractarit, Non ii sanè fuimus nos, qui pestem à fomite, & contactu (quæ duo sunt contagii gratia) ortum posse ducere inficiemur, cum ratio, experimentum, & probatorum Auctorum, Fracastorii potissimum testimonium id satis comprobet (quamquam sanè nemo veterum de hoc contagio ex fomite rerum inanimatarum tractauit) & Aristoteles 7. sect. proble. 4. duplicem tantum contagij modum nouisse videtur ex spiritu, & vapore glutinoso per summam corporis oberrante: quamuvis Philosophus accurate illum locum legenti videri possit contagium lippitudinis à Tabis contagio secernere, cum ait oculum partem nostri corporis nobilissimam facilem moueri ab eo, quod moueat, & proinde cæterarum maxime omnium rei sibi obiectæ similem reddi, atque ita fieri vt perturbatum respiciens oculum facile ipse etiam perturbetur, quare hanc contagij vim in naturalem sympathiam vel facilem oculorum perpeffionem referre videtur: At tabis contagionem ex spiritu corrupto oriri statuit, celerrimè autem omnes morbis iis arripi, qui spiritu corrupto proueniunt, quale est omne pestilens genus, qui enim appropinquarit, talem spiritum trahit qualem æger ille reddiderit; quo loco diligenter obseruandum omnem Pestilentiam statui ab aere vitiatò prouenire vel spiritu corrupto, quæ fuit etiam Hippocratis opinio, & omnium veterum, qui pestem ex contactu, aut fomite rerum animæ expertium, vel in his seruato contrahi non obseruauerunt: Quod à recetioribus obseruatum nos sanè, vt paulò ante diximus, non inficiamur; Id solum damnamus cum passim sprete aeris consideratione à solo fomite produci pestilentiam existimatur: hinc Aeris nulla habetur ratio: soli fomiti cauendo, abigendo, extinguendo incumbitur. Omitto Hippocratem Galenum rucididem, & tot veteres præclaros, & oculatos viros de fomite hoc nihil

nihil fere loquutos in pestilentis, quas fusè commemorant, æquum tamen erat causam hanc tanti ponderis non prætermitti, si eam necessariam esse nouissent; sed innatus pestilentie timor vulgo oculos ita obæcat, vt causis non vsque adeo manifestis contemptis fomitem solum pertimescat, cum causa sit satis aperta, & vulgaris, nam & Galenus id dumtaxat sat habuit dicere, periculosum esse in statu aeris pestilenti cum peste affectis conuersari; aeris quippe constitutio erat diligenter expendenda, qualis nunc vigeat quamve prægressam exceperit, & Hippocratis exemplo præstiterat aerem potius corrigere, desiccare puriorem reddere, quod ipse optime præstitit Athenas, & Græciam à maxima pestilentia vindicans, excitatis compluribus incendiis in vicis publicis, & plateis ciuitatis ex odoratis, & benevolentibus lignis. Verum breuiter rationibus quibusdam communis hic timor extenuandus, vt pariter ostendamus interdictum commercium parum profuturum fuisse si aeris vitio pestis (quod Deus semper auertat) inualuisset. Profecto si fomes in laneis vestibus, aut consimilibus rebus seruatus pestem efficiendi, & propagandi tam insignem habet vim, cur cum peruagata est diù, cessat tamen omnino, remanentibus nihilominus in ciuitate, vbi est grassata, tot vestimentis, atque alia supellestile, qua defuncti peste sunt vsi: Certe oporteret si ex vna bulga rerum infectarum propagari lues initio cepit, tunc magis propagatum iri, & sequi, cum tot res infecte in ciuitate existant, quæ furtis, atq; aliis multis modis distrahantur per vrbes vicos disseminantur, vel etiam à multis absconduntur; præterea si vt ignis fomes ille seruatus pestem propagat, ergo sicuti ignis maior redditus se magis propagat, ita fomes ille, & maiori copia rerum infectarum propagaretur, & maiorem cladem afferret. Accedit facilius esse pestem iam genitam fouere, & seruare, quam uouam, vbi prius non vigeat, ingenerare, hinc igitur fiet vt numquam à peste vindicari possint vrbes, & oppida, cum à fomitibus in vestibus seruatis, quique augentur quotidie necessario semper contagij vis fouenda esset, passim enim res multæ infectorum corporum absconduntur, distrahuntur, & à multis etiam in vsum quotidianum adhibentur, neque enim credendum quantauis diligentia adhibita omnia, quæ fomitem seruare dicuntur, comburi vt igne expiantur, quæ sanè ratio apud viros sanæ mentis debet maximum momentum obtinere. Confirmant hanc Germaniæ, & Aegypti pestilentie, quæ desinunt, & obliterantur faciliè, tamen si nulla ferè adhibeatur diligentia in purgandis, & igne expiandis indumentis, & reliquis rebus, quæ facile fomitem seruare videntur, mutuumq; commercium indiscriminatim tuentur; Omnis igitur pestilens vis ab aere deriuat, cui rei id etiam argumento est, quoniam Austris desinentibus in sicca aeris constitutione cessat huiusmodi lues, & morientium clades, tamen si fomites contagiosi adhuc supersint; præterea nonne verisimile

simile esset vt postquam pestis ex allata exempli gratia bulgarum infectarum incipit grassari, statim etiam extinguere debeat, tum è vestigio rebus iis combustis, & hominibus infectis ex reliquorum commercio seiugatis, & eliminatis, tum tot aliis cautionibus, & præsidis primo illi contagii insultui adhibitis, nihilominus multis sæpe obseruarunt, & legerunt, egoque memini in pestilentia anni 1575. cum duodecimum ætatis annum agerem Veronæ pestilentes morbos, qui ex allato fomite crediti sunt primò coepisse tot consiliis, cautionibus, & apparatibus propagatos esse augmentum, vigorem tum declinationem sponte nactos quod inditio erat in aere vitiato esse contagii vim cum omnes ciuitatis amplissimæ vici, qui numquã antea nec infectos homines nec res vllas pollutas viderant, passim ea labe conflarentur. Hinc etiam fit vt & Nosocomia illa publica Lazarettos vocant mihi semper fuerint suspecta: Initio enim pestilentie tametsi omnes infecti cum sua supellestili eo sint detrusi, & diligenti custodia asseruati semper tamen pestis validè est grassata, & veluti ignis rapidus Urbem, agrosq; depopulata. præterea aer illius loci, vbi sunt tot pestilètia laborantes pestilentior euadit, vt propterea in Lazarettis maxima hominũ pars miserabiliter intereat. Quocirca si Principes peste infectos possim diuisos hospitii, & separatis habitatiunculis in locis salubribus clausos degere præciperet, quis ambigat eos & salubrioris aeris inspiratione, nec tanta animi trepitatione, & faciliori ministrorũ procuratione, & citius conualituros, & minori ex parte suo fato defuncturos. Verum hæc alterius & loci, & contemplationis existunt.

CAPVT DVODECIMVM.

De Epidemia Veronensi anni 1602.

Quantum ab Hippocrate, & Galeno facta sit aeris constitutionum, & mutationum accurata consideratio, satis testantur libri aphorismorum, Epidemici & de aere, aquis, & locis: Et fortasse melius cū genere humano ageretur, si antè impetum morborum vulgarium huiusmodi constitutiones, & mutationes à Medicis accuratè expendere, & obseruarentur, ita enim & prædici, & præcaueri multa incommoda possent, tum certiora, & expeditiora iam vagantibus morbis præsidia adhiberentur. Quapropter mihi in præsentia decretum est veterum vestigiis insistenti breuissimè exponere causas affectionum, quæ huius anni M. DC. II. hyberno, & Verno tempore in Veronensi Agro primum, tum in Vrbe Veronæ sunt grassatæ; eę sanè fuerunt pleuritides, Anginæ, Destillationes contumaces cum molesta Grauedine, & raucedine, Faucium ardores, Febres mali moris, pulmonis complures συντόμας ἀπολλύντες, quæ initio inuadebant,

Vel alię in quas Pleuritides post diem septimum ferē degenerabant, Ab his affectionibus Epidemicis multi sunt in Vrbe absumpti, sed longē plures in Agro, & Villis, & potissimum qui rusticam, & operariam vitam agebant: harum causas externas, & internas exquiremus. Atque illud imprimis est obseruandum huiusmodi morbos non fuisse pestilentes, sed tantum epidemicos vel vulgares, quoniam licet perniciosi fuerint, & multos celeriter interemerint, vt compertū est, nihilominus nec contagiosi fuerunt; nec eiusdem generis, & vnius naturę omnes, nec maximam hominum partem sustulerunt, quę conditiones de Galeni, & medicorum opinionem placitis sunt necessarię, vt morbi, qui vulgantur, sint & dicantur pestilentes. præterea id etiam est animaduertendum morbos communes à communi causa ex Hippocrate ortum ducere: Huiusmodi causa in nostra hac Epidemia non fuit prauus victus ex annone caritate vt manifestum est; omnis ergo morbi labes aeris alterationi accepta referenda: Quoniam verò morbi qui vagari solent, non tantum præsentem Aeris statum sequuntur, sed potissimum antecedentes illius constitutiones, vt ex Epidemicis Hippocratis patet, propterea diligenter considerandum est quis aeris status superioribus temporibus vigerit. Anni igitur superioris æstate vixit aeris constitutio Austriua, eaque sicciore, cuius argumentum & inditium fuit, aer vaporibus, & halitibus compluribus obsitus, imbrium expers, qui talis ferē perseverauit tota ætate: hinc omnes stupore afficiebantur cum Iulio, & Augusto mensibus solem turbidum, & lucem eius impuram, & fuscē quadam, & veluti ferrugine obscuratam cernerent, cum tamen in iis mensibus ob insignem solis vim aer ab halitibus potissimum crassus liber, & lux solis admodum clara, & perspicua cerni soleat, Accessit Autumnus, in quo idem aeris status vixit pluuiarum ferē expers, aut iis rarissimis, & exiguis prædita hoc autem tempus progrediens, aut ferē desinens excepit aeris status borealis, quocirca ex hyemis initio ante brumam acrius, frigus vixit, quàm ea tempestate soleat, pluuię exiguę non diuturnę: aeris tamen caligo crassior quàm par sit, quę singulis ferē diebus Decembri, & Ianuario aerem à primis diei horis ad vesperam vsque occupabat, qui cœli status erat Australis sicciore cum in nubes, & imbrem huiusmodi caligo, & crassior nebula minime verterentur: Nec enim ea aeris humiditas dici poterat, cum ea tantum gemina sit, quę aerem occupat de Aristotelis sententia nubilosa scilicet, & pluuiosa, verum hæc nostra sterilis potius erat nubes vt Aristoteles in meteoris nebulam definit, quę ex halitibus siccis conflata, cum humiditate careret, in imbrem verti non poterat, quocirca Austros huiusmodi siccos vt plurimum dominatos existimo, qui cum simul calentes sint huiusmodi vapores excitant; præterum & Aquilonii flatus, vt sæpe fit hypernis temporibus intercurrent, currebant,

currebant, hinc & glaciem, & nives obuenuisse constat, at constitutio illa Australis siccior clarissime se prodidit primis Februarii diebus, cum caelo admodum sereno, ac purissimo aere illius venti afflatus non solum calidus & siccus, sed prope modum feruens hominum ora afficeret, & in sublimi aere veluti ignitæ quædam nubium impressiones conspicerentur, quæ sanè signa, eo præsertim tempore, magnum metum, & trepidationem plurimis incutiebant, ne pestilentia aliqua noxia, & ingens clades ingrueret; huiusmodi verò afflatus, & aeris status ad vigesimum vique diem illius mensis perdurauit, quamquam postremis diebus longè mitior, & temperatior: Hunc excepit Borealis constitutio, eaque admodum clara, & serena, quæ toto sacri ieiunii tempore, & post diutissime perdurauit, imbrum penitus expers, & vltra vernum æquinoctium longius etiam est progressa. His ita definitis, satis patet vera morborum, qui peruagati sunt, causa, quæ tamen non nisi corpora apparatus morboſo prædita afficiebat: Eum apparatus duplicem statuo, natium, cum multi homines ab ortu naturæ, vel intemperie partium principum laborant, vnde temporis progressu cacochymia euadunt, vel etiam ex laudabili earum temperie plettorici efficiuntur, & longe quam par fuerat, pleniores; vel adscititium, cum ex prauo vsu rerum non naturalium multos, eosque malos succos congerunt; Addo & corporis habitum laxiorem, vel adstrictiorem, partes multas principes debiles vel robustas: Hinc etiam in pestilentia, quæ grauior est Epidemia, Galeno teste, non omnes ea corripuntur, sed qui duntaxat corpora habent disposita: ex Galeno 2. de differentiis febrium. Cum ergo aer ille Australis siccior, & halituosus imbrum expers, quæ Aristoteles etiam noxium existimat, capita replet, & eorum pituitam liquaret, ea facilem ad pulmones decumbebat, qui etiam ab aere illo inspirato deterius habebant, & imbecillitatem contraxerunt. Huiusmodi enim præ æris constitutiones tum exterius corpora alterant, tum inspiratu, & pulsu pulmones, & cor peruadentes hæc potissimum viscera male afficiunt: Hinc destillationes pulmonias, pleuritides spurias, & exquisitas plurimas esse factas scimus: eos tamen præsertim laborasse est obseruatum, qui aeri sese exponentes, corpus vehementer exercebant, quo factum ut Agricola primum ante, & post hybernæ solstitium valde sunt constitati, & plurimi ex his miserandum in modum in pagis assumpti: corpora enim ex laboribus calefacta, & rariora reddita facilius noxiam aeris vim excipiebant, tum interueniens frigida, & sicca Aquilonis constitutio humores liquefactos ad pectus vel pulmones exprimens eorum primum affectus ingenerabat vel augebat, vel corporis habitum adstringens, & consuetam humorum perspirationem prohibens febres mali moris afferebat, idque in iis potissimum, qui corpora parua obtinebant, & viscerum obstructionibus obnoxia: Sed pro-

fecto omnes, qui in pagis laborarunt, cum febre affectus partium spiritualium annexos sunt perpeffi, vt mihi diligenti inuestigatione id perquirenti compertum est. Martij initio sensim Vrbem nostram postmodum inuasit Epidemica hæc lues, Angine pleuritides multæ exquisitæ, & spurix, Febres malignæ, Destillationes contumaces, Grauedines: Quæ affectiones nihilominus minutam potius gentem, & plebeios homines affecerunt, vt diligenter obseruatum est; quod argumento erat hunc Aeris statum non fuisse noxium nisi ijs qui vt dictum est, laboribus, & vehementibus corporis exercitijs sese ipsi exponebant: Certe Ciuium, & nobilium familiarum ægroti longè pauciores extiterunt, nec eo ferè genere ægitudinum affecti: Aliud etiam sententiam hanc nostram, & iudicium confirmat, quod cænobîa & Monasteria monialium, & vinorum religiosorum nullum, vel exiguum ex ijs detrimentum, sunt perpeffa, quoniâ se minus aeri exponunt, & moderatissimis etiam laboribus corpora exercent, præter temperationem & in rebus omnibus victus rationem.

CAPVT DECIMVM TERTIVM.

Quæ remedia profuisse, quæ obfuisse in hac Veronenâ Epidemia visa sint.

Cum ex hac Aeris inæqualitate caloris, & frigoris se mutuo cum perenni siccitate, excipientes mense Aprilij iam Veronæ morborum lues illa valdè increbesceret, & passim vulgaretur, & multi ante septimam diem, non pauci ante quartam itterirent, capî accutate & morborum impetum, naturamque animaduertere, & congruentia etiam præsidia pro morbi specie, & humorum vitio, quantum diligentia eniti poteram, adhibere: Sed illud mirum sane erat quod multi Pleuritis corcepti euestigio optimos medicos aduocantes prima morbi die secta vena, omnibus leopis consentientibus, tum lenita Aluo, ac deinceps aliis præfidiis rite, & ex arte adhibitis, nihilominus ante quartam misere obibant, idque cum in pulmoniam migrasset pleuritis, vt conijcere erat: Quod si fortè pleuritis ultra vndecimam progrediebatur (nisi in Pulmoniam vt multis contigit verteretur) omnes ferè euadebant, quod indicio fuit, peculiare pleuritidum, & perniciosum genus hoc extitisse, quod ita intelligendum velim, vt consuetæ pleuritidis naturæ noua, & ferè abdicta ex Aeris statu malignitas accederet, vt de carbunculis Galenus pulchrè tradit, quorum sanè affectus perpetuo est periculosus, cum ex vitiosis humoribus constet, tunc autem perniciosus est, cum præter naturam malignitatem etiam eam, quæ status aeris affert, coniunctam habet: præterea Hippocrates sudorem in quibusdam febribus damnat, quod ab Aeris malitia obueniebat, qui si ex ipsa illarum febrium

9. in ter.
Epid. 12.

2. in pri.
Epid.

brium natura & figura proueniret, cum intermittentes tertianæ existerent, longè minus malum censeret, Verum quoniam adiuncta erat malignitas Epidemica ob Aeris intemperiem, huiusmodi sudores necessario difficilis iudicij febres significant; tanti refert morbum propriam seruire naturam, vel aliunde adsciticiam menciſci, cum hinc & eius cognitio, & prædictio & curatio valde varietur; Hoc sanè libenter repeto, atque inculco, quoniā à Medicis non vulgaribus diligenter animaduerti velim, quod Hippocrates, & Galenus passim in libris Epidemicis admonent, Iam verò ea pernicies, & malignitas, quæ ab aere accesserat, vnde & colligebatur, quoniā vires statim collabebantur, vt egrotantes in prædicto Pleuritidis genere suffocari, nec quicquam expuere posse viderentur: vt proinde necessarium fuerit primis etiam morbidiebus plenius ægrotantes alere contra Hippocratis atque artis decreta: Certè miraculi instar fuit ante quartam multos pleuriticis concessio vino albo subdulci & diluto tum ouis, & Vituli, aut pullorum iure misicè recreatos, cum antea animam agere videretur doloris acumine, difficillimo creatu acuta febre, ingenti pectoris, & præcordiorum æstu & oppressione conflati. Illud etiam peculiariter in hac Epidemia mirandum, omnes ferè, aut maiorem certè partem eorum, quibus primis diebus secari vena non potuit, quod medicum non accersissent, vel ob alias causas, adhibitis post quartam cucurbitulis incisis malum longè lenius pertulisse, & expeditissime conualuisse, quinimò nec vllus fere (quanti ego diligenter obseruare potui) post phlebotomiam melius habere à pleuritide vel à febre poterat; nisi simul cucurbitulas admitteret, quod argumento erat accuratè rem cogitanti huiusmodi affectiones eguisse præsidij metasyntiticeis ex alto scilicet ad cutem euocantibus: Venæ sectionem in hac Epidemia potius ad interiora humores perpulisse & fluxiones, & obstructions auxisse, potissimum in corporibus cacochymis, in quibus humores valde recedunt à sanguinis natura, nam plethoricos primis morbi diebus vtiliter vena secta euacuatos non disſiteor. Atcedit aliud testimonium, & experimentum non aspernandum; Cum enim innumeri propemodum pauperes ex pagis, & vicis amplissimè Ciuitatis operi medicam petunt domum meam conuolarent quod vel sectionem venæ formidarent, vel iam progressus erat affectus, cucurbitularum usum libentius amplectebantur, qui postmodum ad me redeuntes optimum ægritudinis exitum extollebant, tametsi multi etiam ex iis lateris dolore laborarent, quod sanè possum de plurimis verè attestari: Id etiā iudicium nostrum comprobatur, quod cum initio multi grauitè, & perniciose laborare viderentur cum capitis dolore febre, præcordiorum æstu, siti, & anxietudine, spontè copiosissimo sudore superueniente vel ante etiam cum frictionibus adiuto, cum latitudinem etiam & adstrictionem cutis perſentirent, statim miraculi instar à

febre, & omnibus affectionibus sunt vindicati: Cucurbitulæ ergo & frictions duo sanè optima præsidia visa sunt plurimum in hac Epidemia contulisse: Phlebotomia etiam initio in florentibus naturis, & plethoricis; sed profectò transacta quartam morbidie obvirium imbecillitatem, quæ aderat, & mox statim ad futura erat, ex morbi perniciæ, omnibus vel maiori parti fuit perniciofa, ut patuit; laxare enim corporis habitum, aperire, & humores intro impetum habentes ad cutis ambitum trahere opere prætium erat, quod & ad Pulmones, & Thoracem tamquam ad partes ab aeris constitutione male affectas affatim iij. confluerent. Ex medicamentis manna potissimum, & mel rosaceum, vel violaceum solutiva appellata opem tulisse observatum est, quoniam hæc affectus pulmonis blandè lenibant, laxabant etiam Thoracem, & humores crassos pituitosos mel rosaceum tenuiores & biliosos ex huiusmodi sicciore constitutione pariter ad auctos Manna commodissimè expugnabat; His diasebesten solutivum, & Diacatholicum aptissime adiungebantur: Infusiones etiam ex Agarico Trociscato, Khabarbaro, Sena, polypodio visæ sunt aptissime accommodatæ: vehementiora medicamenta parum utilis, potius noxia experiebamur, tum ob virium celerem, & repentinam imbecillitatem, tum quia humores interius agitati, diffusi, & calefacti magis à validioribus medicamentis promptius ad partes principes confluebant, ibique firmati inflammationes vel insignes obstructions & putredines efficiebant; quocirca & lumbricos etiam ex humorum putredine in ventre, vel intestinis sæpenumero prodijisse, observatum est. Sanè quod magnus Hippocrates libro de moderatis purgantibus scripsit, huic nostrati Epidemiæ congruere maxima ex parte potuit; Quicumque ait, a febribus fortibus corripuntur his medicamenta purgantia dare non oportet, donec remiserit febris, sin minus saltem non intra decimum quartum diem, carnes enim ipsorum, & Ventres cum calidi sint, medicamentum assumunt, & nihil expurgantur, & febris maior sit, & color evertitur, & morbi regii speciem præferunt: Commota enim Bile, & non purgata, non vult forbere æger, neque bibere, sed omnia abominatur, & plerumque pauet. Hæc profectò aurea Hippocratis dicta iis diligenter animadvertenda, qui non expensa uaria morborum Epidemicorum causa medicamentis purgantibus miseros egrotantes torquent; Velim enim hoc accuratè observari, ne Empiricorum more cunctos unico calceo induamus: & profectò si aliqua in re circumforanei isti Magistri ab Hippocraticis Medicis discrepant, hæc una est potissima, quod impetum & causas popularium morborum non optime observant, & exquisitè distinguunt, ut hoc pacto ipsis ritè mederi valeant. nec observatur ad vnguem Hippocratis præceptum, quo iubemur quicquid in morbis diuinum subest, contemplari: sed de his hætenus. integra cœctio in huiusmodi morbis ante undecimam expectari non potuit

potuit; prius enim vires succumbebant, quam natura, & calor ingentus sua opera moliretur, quare in Vigore multi, multi etiam in augmento peribant; qui etiam seruabantur absque coctionis signis aut criticis excretionibus & abscessibus id assequi videbantur. Qui vnde cum pertransibant cum iis omnibus signis vindicari videbantur cum iam natura in pugna superior facta reliquias materiæ melius elaborandas aggrederetur. Sæpenumero obseruatum est ex Pleuritide conualescere multos optimis coctionis signis in sputis, & Urinis, sed ex conuersione in Pulmoniam omnia signa denuò deteriora reddita. Vinum proculdubio maximam opem attulisse visum, tum quoniam spiritus, & vires recrearet, expulsiuonem, & cæteras euacuationes promoueret, & iuaret, præterea & languentem appetentiam excitaret, idque etiam cruda adhuc materia, vt iam in vulgus rumor increbesceret vinum pro his adimendis affectionibus mirificum esse præsidium. Sed medius fidius, cum morborum perniciositas obstat à regulari & legitima curandi ratione interdum desciscendum, vt optimis etiam, & clarissimis medicis visum est, Trincauellio, Fernelio, Vallesio, Capiuaceo; tum etiam Montano. & Fracastorio nostratibus, quorum auctoritati & doctrinæ Hippocrati & Galeno consentaneæ, tamquam orthodoxæ cuidam sententiæ Empiricorum nugas, & ieiunas aliorum disputationes postponendas esse mihi facile persuadeo. Ex his causæ externæ, & internæ huius præteritæ Epidemiæ, & præsidiorum ratio satis perspecta videtur.

τέλος. Anno 1602. Veronæ Mense Septembri.

30
ANDREAE CHIOCHI
MEDICI, ET PHILOSOPHI
DISPUTATIO.

*Utrum sanguinis missio in obstructione ex humorum
qualitate conueniat: Galeni doctrina accu-
rate exposita, & defensa.*



Quod vitium sanguinis quadruplex penes substan-
tiam, quantitatem, qualitatem, & motum, specta-
tum phlebotomiam indicet, vberi tractatione
Apologetica fuit à me contra recentiores quos-
dam aliàs ostensum: sed maxima ex Galeni ver-
bis, & auctoritate difficultas orta multorum eru-
ditorum virorum ingenia ita defatigauit, vt va-
rijs sententijs, & interpretationibus, & locos Galeni pugnantes con-
ciliare, & propria decreta tueri non destiterint; Nos etiam de propo-
sita difficultate quid sentiendum sit, aperiemus, quoniam ea ad pra-
xim medicam magnum vsus confert, atque ea non bene exposita
posset venæ sectio interdum multis ægotantibus esse perniciofa.
Indicia quippe libera esse debent, nec cuiquam præripi facultas de-
bet, quominus ingenue in quouis medico argumento versetur: li-
cet enim in Galeni, & Hippocratis, verba iurauerimus, recentiorum
tamen hac in re ad fastidium vsque excussa commentaria nihil sanè
nobis satisfacere possunt; sed iam difficultatem proponamus. Du-
plex esse obstructionis genus, vnum, quod ex humorum qualitate
constat, alterum quod ex succorum plenitudine experientia ipsa, &
Galeni auctoritas satis conuincunt: Id sanè Galenus. 10. Meth. ca-
pite 2. disertis verbis docuit; quo eodem capite subdit præferri
in ea, quam copia facit sanguinis missionem, in ea quæ ex humorum
crassorum, & viscidorum qualitate consistit, attenuantium vsus;
lib. etiam 11. cap. 14. aperte docet Galenus nec obstructionem, nec
putredinem per missionem sanguinis curari, sed hæc alia remedia
desiderare, si enim neque obstructio subesset, neque putredo, pro-
tinus, si sola adesset succorum copia, à missione sanguinis, pro naturæ
suarum ratione se haberet, qui ea febre putrida laboraret, de qua sermo
nem instituerat, quare satius esse existimat aliquid sanguinis probi
in magna succorum putredine, & cacochymia relinquere (ita enim
intelligendum censeo Galenum) ne intempestiue nutrire cogamur,
atque hoc pacto febrem augeamus; ex hoc loco colligimus mani-
feste nos

ne nos in febris putridis ex obstructione, & humorum qualitate, & cacochymia pendente, cautos in mittendo sanguine esse debere, ne id incommodum consequatur quod ante memoratum est.

Caterum altera ex parte lib. 8. Meth. cap. 4. dum diariam febrem ex obstructione in calida, & sicca natura progenitam curare docet, ne in putridam migrēt, disertē tradit, protracta illius febris inclinatione eam suspectam reddi, quamvis putredinis iudicia adhuc in pulsu non appareant, nisi enim vitiosus succus transpiret, necesse est ut putrescat, ergo ut transpiret maiore auxilio est opus: secandam igitur esse venam, si nec puer, nec senex sit, nec ipsi robur desit, etiam si plenitudinis signa non adsint, præstare enim maiori vitiosi succi parte emissā ad detergendas obstructions accedere, cum remedia deobstruentia ante euacuationem totius corporis, obstructions magis impingant, periculum enim esse ne excrementa vel crassa, vel lenta, vel multa ab ijs, quæ foras trahunt simul rapiantur, quæ cuti hærentia, & infixā obstructionem gement; Verum aliam causam adducit Galenus cur præstet totius ante omnia inanitionem moliri, quoniam inquit fuliginosa excrementa, quæ transpirant, succis ipsis imminutis pauciora restabunt: Iam vero hoc in loco Galenus de obstructione ex humorum qualitate constante verba facit, cum ex vitiosis succis in natura calidiore, & sicciore eam progigni asserat, & nihilominus venæ sectionem mirifice probat, eiusque duplicem, eumque insignem fructum commemorat, & rationibus sancit. quo pacto igitur hæc erunt consentanea ijs, quæ 11. Meth. 14. & 4. de tuenda Galenus, constituit? quò loco sanguinem (ait) medium esse biliosorum, & crudorum succorum, & ubi plurimum citra sanguinem restitum, vel ultra processum est, nullum tunc mittendum esse sanguinem monet, & ubi bonus sanguis exiguus, reliquus vero succus plurimus, abstinendum à missione sanguinis esse; Aureum etiam præceptum eodem 4. de tuenda cap. 5. scribitur, ab omnibus Medicis diligenter observandum, In copia nimirum crudorum succorum sanguinem non esse mittendum, cuius præcepti demonstratiuam rationem affert, quippe incisa vena, ait, bonum sanguinem emittit, malum, qui in primis maxime venis circa iecur, & quod Mesenterium vocant, colligitur in totum attrahit corpus, ex quo loco etiam collegimus falsam esse quorundam Medicorum sententiam, qui ex venæ sectione retrocedere intro humores noxios autumnant. Hæc igitur si vera sunt, & à Galeno plane confirmata, cur in obstructione ex humorum qualitate in corpore calido, & sicco 8. Meth. sanguinis missionem probat? Respondent recentiores quidam viri doctissimi, sed galenicæ factioni apprimè addicti, obstructionem bifariam perpendi, vel prout adhuc sit, & hoc pacto omnem obstructionem phlebotomiam postulare, siue illa ex succorum copia, siue ex sola eorum qualitate generetur, vel prout est facta, & hac ratione eam

dumtaxat obstructionem, quæ ex succorum multitudine fit, per sanguinis detractionem curari; ita enim in hac contrarietatis regula seruari, in illa vero obstructione, & in omni alia, quæ adhuc fiat humores fluentes semper euacuandos esse, ac reuellendos, quod sectione venæ commode perfici animaduertunt.

Verum profectò aut ego nihil intelligo, aut hæc eorum doctrina totam Galeni disciplinam non solum peruertit, sed noxiam etiam reddit, quod planè, & solidè me ostensurum profiteor: Imprimis. n. Galenus eo. 8. meth. cap. 4. obstructionem factam cōsiderat, ait enim succos crassos & glutinosos esse impactos, at hoc non est succos fluere, sed iam osculis vasorum hære, & obstructionē factam, fouere; præterea docet humores in ea febre haudquaquam trāspirare, quod obstructionis factæ indicium est. Obstructionis etiam magnitudinē ex febris magnitudine discerni docet, ergo sine controuersia Galenus eo in loco obstructionem iam factam perpendit, quare ea distinctione fecentiorum adhuc à repugnantia, crimine Galenum exemptum non videmus.

Hunc difficultatis nodum facilè dissolui posse existimo si attente Galeni verba eo cap. 4. perlegantur, non enim ea vasorum interiorum obstructionem, aut quæ ad viscera præcipua pertineat nobis exprimunt, sed cutis dumtaxat obstructionem, quæ inter causas stipationis eiusdem à Galeno recensetur, quocirca hæc longè alia est obstructio, in corporis enim ambitu obstructo succorum perspiratio prohibetur, quare periculum imminet ne febris putrida subsequatur intus cohibitis acribus, fuliginosisque excrementis, ex quibus sanguinis massa afficitur, & ad putredinem concipiendam facillimè disponitur. Nulli vero dubium esse potest, quin ea natura calida, & sicca eos humores vitiosos habeat, qui non multum à natura sanguinis recedant, alioquin temperandum à phlebotomia erat: sed profectò nec virium robur cum insigni recessu humorum à sanguine iunctum esse poterat, præterea monet etiam Galenus eam osculorum venarum cutis obstructionem à multis etiam fieri succis, qui eo attracti, & osculis impacti obstructionem faciant, quocirca hinc etiam intelligimus ab humoribus sanguinis naturam referentibus eam fieri posse multitudinem: & *πλῆθραν* ad sanguinem potissimum referri in confesso est.

Cæterum præter ea, quæ supra illi opinioni obiecimur, valida ratione, eam nobis hoc pacto infringere fas est. Vena scindi ad sanguinem detrahendum non debet, nisi ætas, viresque ægrotantis consentiant, at vires in obstructione ex humorum qualitate in corpore cacochymo & *πικροχάλω*, vbi maxime, & plurimum à natura sanguinis humores recedunt, aut in præsentia non consistunt, aut in posterum non consistent, non ergo in obstructione fiente huiusmodi sanguis est mittendus; Quod assumprum est ita probamus, si fatentur

istī obseruationem huiusmodi ex humorum qualitate factam iam & confirmatam sanguinis missione curandam non esse, cur eam fieri temita curare volunt? nonne trassi, & glutinosi succi præ sanguine in corpore valde exuberant, at hoc pacto virium robur adesse non potest, vel diutius perdurare: ita enim oportet plurimum citrà restitutum esse, vel vltra processum, vt Galeni verbis vtamur. 4. de tuen. valet. cap. 4. hoc est vel succos crudos, & pituitosos, vel Biliofos, & Melancholicos apprimè exuberare, & à sanguine recedere, quo tempore à vena secanda esse abstinendum prudenter diuinus Galenus præcipit, quoniam virium sanè robur constare non potest.

Verum & aliam adnectamus: maximi ponderis rationem: Duo sunt maxima præsidia, quibus dum morbus magnus adest, vel imminet in corpore euacuando vtimur: Venæ sectio, & purgatio; at illa vitium sanguinis à quo indicetur exposuit, purgatio ergo à succis vitiosis, qualitate peccantibus, indicabitur quæ etiam vim reuellendi humores fluentes habebit, & sic obstructionem fientem curabit, hoc enim aduersarijs subterfugium, reliquum erat, quod tamen iis adæptum volumus, cum venæ sectione prauos succos fluentes reuelli dicebant; sed enim purgatio melius & tutius id præstat, quippè quæ humores vitiatos à sanguine alienos, & euacuat, & reuellit, Dari enim purgationem reuellentem, & ratio, & experimentum, & Galeni auctoritas satis docent, quod nos alias in nostris quaestionibus in lucem editis abundè demonstrauiamus. Nec profecto istorum doctrina vllò pacto à viro sanæ mentis ferri potest, cum siue sanguis exuberet, & quouis alio modo peccet, siue cæteri humores sanguinis paucitate, statim sine vllò discrimine, aut delectu ad secandam venam confugiunt, quo præsidio sicuti nullum est præstantius, ita nullum esse perniciosius mihi persuadeo, si incongrue, & inconsiderate vsurpetur. Fatentur quippe hi Viri eruditissimi phlebotomiam sanguini peccanti, purgationem cacochymix debere, atque vnum præsidium ab vno indicante indicari, sed postea mirifica se ipsos repugnantia inuoluunt, à qua numquam certe se expedire poterunt, dum à morbo magno, quatenus talis est, indicari sanguinis missionem statuunt, nullo adhibito examine, quis nam in corpore humor potissimum peccet: sed profecto & purgationem à morbo magno indicari ita apud Galenum constat, vt peruiacis, aut stupidi ingenij sit, vel verbum vllum hac de re studio contentionis, velle facere: Vetus ergo doctrina sancta, & recta retineatur: Vitium sanguinis Phlebotomiam, cacochymiam purgationem indicare; alterutrum insigniter peccantis indicium esse morbi magnitudinem, à qua tamquam à notiori signo si quis indicationem sumi vel purgandi, vel mittendi sanguinis dixerit, non repugnamus, dummodo id ratū & certū maneat, venæ sectionē a vitio sanguinis, purgationē a vitio aliorum humorū à sanguine, indicari; si proprie loqui velimus.

Hæc

Hæc omnia eo dicta, & explicata sunt a nobis ut probaremus obstructionem ex humorum qualitate constantem, nec factam, nec fientem, quantum in ipsa est per uenæ sectionem curari, cum purgatio & reuellere, & vacuare vitiosos succos à sanguine alienos debeat: quæ hoc pacto, quò minus illa fiat obstructio, prohibere: si enim in hominibus sanis missio sanguinis cum humores ob insignem frigilitatem, vel caliditatem plurimum distant à forma sanguinis maxima virium fitiactura, propterea tale remedium Galenus à de tuespla, sanis interdicat, quanto magis in febribus vigente putredine vires longe imbecilliores reddentur? Quæ sane doctrina præstantibus quibusque Medicis semper placuit Trincavellio, Valefio, Massæ, Iacchino Vallerio, & Manardo, Capiuaceo, atque alijs, qui totam ætatem in Galeni placitis accuratè euoluendis consumperunt.

At rursus vocem tollunt, salutariter in omni febre putrida sanguinem mitti de Galeni sententia, hæc vna sancita lege, dummodo ætas, & vires hoc remedium non prohibeant; nam i. Meth. cap. i. §. optimum ait esse Galenum venam incidere non solum in synochis febribus, *αλλὰ καὶ τοῖς ἄλλοις ἀπαιεῖται ἐπὶ σφοδρῶς χυμῶν* legi volunt *ἐπὶ σφοδρῶς χυμῶν*. Ut aliæ febres à synochis intelligantur, quæ ab humoribus putrescentibus fiunt. Vtrumque autem legemus, certum est Galenum vitium sanguinis semper præ oculis habuisse, quod tribus modis consideratur, vel enim sanguis peccans causæ principalis rationem habet, ut in synochis, vel causæ morbum adiuuans, vel sine qua tuto morbus, vel febris auferri à Medico nequit; His duobus modis sanguis suspectus esse nobis pòt in alijs febrib. à synochis, ut in quartanis, tertianis, quotidianis: quocirca prudens Medicus ad secūdā venam se accingit, vbi nec ætas, nec vires prohibuerint. Vitium igitur sanguinis semper ante oculos habendum, nec tam temere, aut præcipitanter sanguinis missio precipienda, quod & Galenus veluti nos commonefacit primo lib. ad Glaucōnem in curatione tertianæ non exquisitæ cum ait, quod si sanguinem mittere oporteat, neque hoc quoque omittendum, sed ab initio statim adhibita earum rerum, distinctione tantum mittendum, quantum præsens exigit status: Quis non videt hæc Galenum sub conditione sanguinis præcipere detractiōem in ijs febribus? ergo aperte cōcedit aliquādo euenire posse, ut nullus sit in ijs febribus phlebotomiæ vñs, sed vult adhibendam esse distinctionem earum rerum quæ sunt scitu necessaria, & ab ipso aliàs copiosè explicatæ, ut nimirum ratio habeatur ætatis virium, anni temporis, humorum peccantium, & si quæ alia sunt eiusdem generis. In tertiana etiam Galenus venæ sectionem prætermittit in quartana probat, si fortè sanguis vehemētèr superabundās appareat, & si vena incisa, qui fluit sanguis crassus, ac niger videatur, alioquin statim suppressendum, si flauus, & tenuis apparuerit. Quid igitur? Nonne sunt istæ febres ex putrescente humore proge-

progenitus? Galenus tamen in ijs interdum illud præstantissimum remedium improbat. Non ergo febris quæ talis est semper id exposulat, cum ab humoribus à sanguine alienis producit, qualis bilis est, pituita, & Melancholia, neque solæ vires, & ætas respiciendæ in illis febribus ut sanguis mittatur, sed si de vena secunda cõsistum vnquam capiendum est; sanguinis status ægrotantis hominis spectandus, an ille vel gignat, vel foueat præsentem febrem, vel saltem eius legitimã curationem impediatur, quemadmodum acutè Galenus vidit quartanam à sanguine abundante foueri, à quo etiam eius legitima curatio potest impediri: Remedia enim incidentia, & attenuantia cum calida sint, quibus humores crassos incidimus, si vehementer superabundet sanguis, eum fundere possunt, & liquare, quare præstat ante omnia eum exhaurire, & potissimum in Quartana si crassus sit, & niger, quoniam & causæ fouentis rationem obtinet, quod si flauus, & tenuis extiterit, statim esse suppressendum præcipit, quoniam in quartana valde recedit putrescens humor à sanguinis natura, ut patet, cum vel calidus, & siccus, vel frigidus, & siccus existat, quare sanguinem probum tanquam Thesaurum quempiam naturæ seruandum vult Galenus.

In his profectò Galeni locis explicandis mirifice se torquent aduersarij, & in febre quartana malitiosè ea galeni verba omittunt (si forte sanguis vehementer superabundans appareat) ita enim manifestè videtur galenus sanguinis vitiū spectasse, & cum lib. aduersus Erasistratos, cap. 6. scriptum legimus; Qui nostra tempestate cunctas febres in principio venæ sectione indigere putant, non mediocri sanè noxa ægros afficiunt, dicunt ijs verbis dumtaxat reprehendi quosdam iuniores Erasistrati sectatores, qui nec mensuram sanguinis mittendi, nec venarum secandarum rationem tenebant; sed proculdubio nihil ijs clarius ad eorum refellendam doctrinam legi existimo, quam sanè adeo imbibebunt, ut præsentibus dumtaxat ijs tribus scopis, virium, ætatis, & morbi magnitudinis nulla alia re perspecta, nulla alia conditione adhibita euestigio ad illud remedium euolent; Illud mehercle audeo palam profiteri, atque Medicis omnibus ingenuo, & philosophico animo præditi inculcare, galenum alitem non posse à repugnantia euidentissima vindicari, si quæ ad Glauconē, & 11. Meth. 14. & 14. de tuenda 4. scripsit comparentur ijs, quæ 8. Meth. 4. & 11. Meth. 15. leguntur, sed nostra expositione omnia clara, & veritati consentanea redduntur, cum aliorum sententia & explicatione mihi illa magis inuoluta, & tenebris Cymæiis obscuriora reddi videantur. Ut hac de re scriberem, sum Emilij Campolongij medici Clarissimi hortationibus incitatus, qui per litteras id à me obnixè efflagitauit. Cum eum nupenimè de vniuersa studiorum meorum ratione certiolem fecissem. Et quamuis hanc

meam

meam Galenicæ sententiæ explicationem & rationes à me allatas ipsi adhuc non communicaueram, existimo tamen ijs in lucem editis ab ipso inter legendum calculum addendum, cum ferè doctissimi quique viri in Veteri doctrina retinenda, & tuenda conspirent.

